

DOMINGU XI TEMPU KOMÚN – TINAN B

TEMA

Liturjia Domingu da-XI Tempu Komún nian konvida ita atu hateke ba moris ho konfiansa no esperansa. Maromak, fiél ba ninia planu salvasaun nian, kontinua ohin no nafatin atu lori ema nia istória ba meta ida moris nakonu no ksolok rohan-laek nian.

Iha *leitura dahuluk* (Ez 17,22-24), profeta Ezequiel asegura Maromak nia Povu, ne'ebé desterra iha Babilónia, katak Maromak la haliha ninia Aliansa, la haluha mós promesa sira halo iha tempu uluk. Maski mosu akontesimentu oioin, dezastre no krize sira ne'ebé hola parte iha istória, Israel tenke kontinua konfia iha Maromak ne'ebé fiél no la deziste atu ofere se ba nia Povu futuru ida hakmatek nian, justisa no dame rohan-laek.

Evanjellu (Mc 4,26-34) apresenta mai ita katekeze ida kona-ba Maromak nia Reinu – realidade foun ne'ebé Jezús mai atu haklaken no propoin. Ida-ne'e maka projetu ida, ne'ebé se hateke ka tetu ho lójika umana, parese katak nia sei la hetan susesu; maibé iha nia soi Maromak nia dinamizmu no nia sei to'o ba mundu no fuan hotu. Lahó tarutu, lahó ansi, lahó publicidade, fini/musan ne'ebé Jezús karik sei halo atu realidade tuan ne'ebé ita koñese, neineik-neineik, sei husik fatin ba lalehan foun no rai foun ne'ebé Maromak hakarak ofere se ba ema hotu.

Leitura daruak (2 Cor 5,6-10) fó hanoin mai ita katak moris iha rai-ne'e, ne'ebé marka ho finitude no tranzitoriedade katak loron ida sei hotu, tenke moris nu'udar peregrinasaun ida ba hasoru Maromak, ba moris definitivu. Sarani tenke konxiente katak Maromak nia Reinu (ne'ebé Evanjellu ohin nian temi), biar iha ona ita-nia dalan atuál istória nian, sei atinje ninia maturasaun nakonu iha tempu nia rohan, bainira ema hotu feto no mane sira sei tuur iha Maromak nia meza no simu husi Maromak moris ne'ebé la nahas. Ita hotu tenke hateke ba ne'ebá no la'o ba ne'ebá, ne'e maka vizaun ne'ebé tenke anima ita-nia la'o-rai.

LEITURA I – Ez 17, 22-24

Iha tinan 609 mK, faraó Neco halakon liurai Josias no tau iha tronu Judá Joaquim, ne'ebé durante tempu ruma selu rai-teen ba Ejitu. Maski nune'e, iha 605 mK, Nabucodonosor halakon tropa Assíria no Ejitu nian iha Carquemish, hodi kontinua nia kampaña iha diresaun Ejitu nian no asume kontrolu Síria no Palestina nian. Joaquim tenke selu impostu/rai-teen ba fali Babilónia. Bainhira, iha 601, Nabucodonosor la konsege manán Ejitu, Joaquim hanoin katak ne'e oras atu liberta an husi Babilónia nia ukun. Maibé, Nabucodonosor reajen hodi tau serku haleu Jerusalém, iha 598 mK, no Joaquim mate durante serku, eh deporta tiha ba Babilónia. Jeconias mak troka nia, no liutiha fulan tolu rezisténsia nian, nia rende ba Babilónia (597 mK).

Nabucodonosor hatuur iha tronu Judá nian Sedecias. Durante tempu ruma, Judá mantein hakmatek, hodi selu ho tempu rai-teen ba Babilónia; maibé, liutiha tempu ruma, hodi aproveita situasaun política favorável, Sedecias ba hamutuk ho Ejitu no para atu selu tributu. Nabucodonosor haruka kedas ezérsitu ida atu tau serku ba Jerusalém. Maski simu tulun husi Ejitu, Jerusalém tenke rende ba Babilónia. Sedecias, aproveita rai nakukun, koko atu halai husi sidade; maibé kaer tiha nia, sira oho nia oan sira iha nia oin no lori dadur nia ba Babilónia, no mate iha ne'ebá.

Ezequiel, “profeta esperansa nian”, desterradu iha Babilónia ezerse ninia misaun profétika entre judeu sira desterra iha ne’ebá. Profeta ne’e halo parte grupu dahuluk lori ba Babilónia iha rinan 597 mK, depoizde Jeconias lakon.

Faze dahuluk ministériu Ezequiel nian hala’o entre 593 mK (data ninia bolun nian) no 586 mK (data tropa sira Nabucodonosor nian harahun Jerusalém no ba dala rua lori sai judeu sira ba Babilónia). Iha faze ne’e, Ezequiel buka halakon esperansa falsa sira katak sira-nia terus atu remata ona, no haklaken katak sira-nia dadur sei kleur... Sira sei la fila lalais ba Jerusalém, maibé denunsia ema sira ne’ebé hela iha Jerusalém tanba sira-nia salan no infidelidade sai barak ba beibeik hasoru Jahwéh.

Iha kontestu ida-ne’e mak Ezequiel propoin “enigma” ida, “ai-kanoik” ida, ne’ebé apresenta mai ita iha kapitulu 17 ninia livru nian. Nia ko’alia kona-ba “makikit” ida (provavelmente liurai Nabucodonosor), ne’ebé “mai husi Líbano han ai-sedru nia tutun. Nia kaer sanak ida aas liu” (provavelmente liurai Jeconias) no lori ba país komersiante sira-nian (katak, Babilónia). Iha nia fatin, nia kuda ai-hun seluk (provavelmente Sedecias). Ai-hun ne’e, “uvas-hun” ida, sei la hetan susesu, maski halo tentativa sira aliansa nain ho Ejitu. Sei lori nia dadur ba Babilónia no sei mate iha ne’ebá (Ez 17,10).

Mensajen “enigma” ne’e nian momoos kedas: sira ne’ebé iha ezíliu lalika kuda iluzaun bainhira haree jogada polítika Sedecias nian, aliadu ho Ejitu sira. Polítika Sedecias nian, iha Jerusalém, la signifika liberdade ba desterradu sira, maibé, sei lori ba katástrofe foun ida.

Entaun buat hotu remata nune’e ona? Sei la iha tan ona esperansa? Maromak abandona definitivamente ninia Povu no haluha ninia promesa salvasaun nian?

Iha situasaun ne’e mak enkaixa orákulu salvasaun ne’ebé leitura dahuluk apresenta mai ita; lae, maski hasoru situasaun dramátika tempu prezente nian, Maromak la abandona nia Povu, maibé sei harii ho nia istória foun ida, salvasaun no grasa nian.

MENSAJEN

Maromak la haluha promesa Nia halo liuhusi profeta Natan (kf. 2 Sm 7), iha-ne’ebé nia asegura David kontinuidade nia tronu nian. Loos duni katak dinastia David nian (“sanak aas li ai-sedru nian” – Ez 17,3-4) fokit sai tiha; maibé Maromak la abandona nia Povu: Nia rasik sei foti “sanak foun”, kuda nia iha foho Israel nian, halo nia fó fuan no sai ai-hun rezistente no boot (Ez 17,22-23) – katak, sei hatuur fali dinastia David nian iha Jerusalém, hodi asegura ba nia Povu futuru ida nakonu ho moris, ksolok no dame rohan-laek.

Testu subliña, uluknanai, Maromak nia prezensa kbiit-na’in iha istória umanidade nian. Nia prezide istória umana, soi projetu salvasaun ida no lori nafatin ema nia dalan tuir nia planu sira. Podér foti-an impériu umanu hotu la iha kbiit ida hasoru Maromak, na’i istória nian no, ida-ne’ebé ho pasiénsia no domin, sei konkretiza nia projetu.

Aliende ne’e, Ezequiel asegura desterradu sira Maromak nia “fidelidade” ba ninia promesa sira. Maromak la husik nia Povu; Israel tenke aprende konfia iha Nia. Buat hotu bele monu, buat hotu bele falla; Maromak de’it la falla.

Testu mós hatudu Maromak nia “lójika”: Nia foti ida ne’ebé ki’ik iha ema nia matan (“ai-sanak foun ida” – Ez 17,22) no, ho nia, manán kbiit-na’in sira nia foti-an no prepoténsia, konfunde sira ne’ebé iha kbiit no hasae ema haraik an sira. Maromak prefere ki’ik sira, fraku sira, kiak sira (sira ne’ebé iha haraik an no simplisidade disponivel atu simu Maromak nia dezafiu no don sira); liuhusi sira mak Maromak konkretiza nia projetu salvasaun no grasa nian.

Iha versíkulu uitoan ne’e nia laran ita hetan kapitál boot liu esperansa nian, ne’ebé tenke habiit no anima, ohin hanesan uluk, Maromak nia Povu nia dalan iha istória.

LEITURA II – 2 Cor 5, 6-10

Iha tinan sira 56/57, to'o iha Corinto misionáriu itinerante sira ne'ebé apresenta an nu'udar apóstolu no kritika Paulo, hodi lansa konfuzoan iha comunidade. Provavelmente, sira ne'e mak "judaizante" sira ne'ebé hakarak impoin ba pagaun sira ne'ebé konverte prátika sira Lei Moisés nian (no karik sira mós mak ema sarani sira ne'ebe kondena Paulo nia severidade/dixiplina maka'as no apoia laxizmu Corinto nian). Paulo ne'ebé simu informasaun katak ema kuestiona validade ninia ministériu nian bá lalais kedas Corinto, dispostu atu enfrenta problema. Konfrontu sai violentu no Paulo hetan kanek todan husi membru ida comunidade nian (kf. 2 Cor 2,5-11;7,11). Tuir mai, Paulo husik Korintu no bá iha Éfeso. Liu tiha tempu ruma, Paulo haruka Tito bá Korintu, atu tenta rekonsiliaisaun. Bainhira Tito fila, nia lori notísia di'ak: konsege manán tiha diferensa no sarani sira Korintu nian hamutuk fali iha komuñau ho Paulo. Iha altura ne'e mak Paulo, ho fuan kmaan no iha dame, hakerek Surat ne'e ba Korintu sira, hodi halo apolojia kona-ba ninia apostoladu.

Testu propoin mai ita integra iha parte dahuluk Surat nian (2 Cor 1,3-7,16), iha-ne'ebé Paulo reflète no hakerek kona-ba grandeza no difikuldade sira, risku no kompensasaun sira husi ministériu apostóliku.

Iha períkopa ne'e husi 4,16 to'o 5,10, Paulo defende ideia katak, maski hasoru buat hotu ne'e, soi tebes atu hakohak Maromak nia dezafiu sira: iha finál dalan nian iha rai ne'e, moris foun ida hein ita, moris nakonu no rohan-laek. Atu ilustra kontraste entre vida iha rai ne'e no vida abanbairua, Paulo utiliza (kf. 2 Cor 5,1-4) ilas tenda/taka-baluk nian ne'ebé monta no desmonta (representa vida tranzitória no korruptível rai ne'e nian) no uma harii metin (representa vida nakonu no rohan-laek).

MENSAJEN

Moris iha rai, moris ne'ebé liu lais no mortál, ba Paulo mak ezíliu ida "dook husi Na'i" (vers. 6). Tempu ezíliu nian iha mundu ne'e karakteriza ho koñesimentu parsial de'it kona-ba Maromak: ne'e mak tempu fiar nian. Paulo – hanesan fiar-na'in loos hotu – hein ho ansi tempu "vizaun" nian – katak, tempu enkontru oin ho oin ho Maromak. Entaun, vida ne'ebé remata no tranzitória sei fó fatin ba moris glória nian no moris ne'ebé sei la naksobu.

Leitura simplista versíkulu sira ne'e nian bele tranzmite ideia katak Paulo la iha interese ba moris rai nian; ideia ne'e la loos... Ba Paulo, perspetiva vida foun, nakonu no rohan-laek, la signifika husik responsabilidade sira ne'ebe ita iha, nu'udar fiar-na'in, enkuantu ita la'o iha rai ne'e. Fiar-na'in sira, enkuantu horik iha isin mortál ne'e, moris tuir Maromak iha ezijénsia sira, la'o iha fiar nia roman, asume sira-nia responsabilidade nu'udar Kristu nia dixípulu no kompromete an ho ninia Reinu. Moris rohan-laek mak fundamenta no leno sira-nia kompromisu ba Jezús Kristu no Evanjellu.

Paulo nia preokupasaun la'ós apresenta doutrina eskatolójika ida define ho modu perfektu; maibé, liuliu fó hanoin ba sarani sira kondisaun la'o-rai nian, katak sira la iha horik-fatin permanente iha rai ne'e: destinu ikus mak enkontru ho Na'i, vida nakonu no definitiva.

EVANJELLU – Mc 4, 26-34

Parte dahuluk Evanjellu tuir Marcos (kf. Mc 1,14-8,30), apresenta Jezús nu'udar Mesias ne'ebé haklaken Maromak nia Reinu. Marcos buka hatudu oinsá Jezús, ho liafuan no jestu sira, haklaken mundu foun ("Maromak nia Reinu"), livre husi egoizmu, opresaun, injustisia no buat hotu ne'ebé halo ema sai atan no impede sira iha asesu ba moris loos.

Ita iha Galileia, inísiu anúnsiu Reinu nian. Ema lubun boot tuir Jezús atu rona nia hanorin sira (kf. Mc 3,7.20.32; 4,1). Jezús presiza uza linguajen asesivel, moris, kuestionadora, konkreta, dezafiadora, evokadora, pedagójika, ne'ebé bele kuda iha ouvinte sira nia fuan, konxiénsia kona-ba realidade foun no revolusionária ne'ebé Nia hakarak propoin. Iha kontestu ne'e mak mosu "ai-kanoik" sira.

"Ai-kanoik" mak linguajen baibain iha literatura povu sira Médio Oriente nian: jénio orientál gosta liu ko'alia no hanorin liuhusi ilas, komparasaun sira, alegoria sira, duké liuhusi diskursu lójiku, malirin liu, rasional liu.

Linguajen ai-kanoik nian iha vantajen ruma. Ulknai, sai kilat di'ak ida kontrovérsia nian. Bele lori interlokutór atu admite pontu ruma ne'ebé nia la konkorda, se uza meu seluk. Ai-kanoik mak instrumentu di'ak diálogu nian, liuliu iha kontestu polémiku sira.

Daruak, ilas eh komparasaun riku no iha forsa komunikaun boot no podér evokasaun nian, duké espozisaun teórica. Karik la klaru husi pontudevista rasonál; maibé kle'an liu, nakonu liu ho sentidu, evokadora liu, tan ne'e, nia bele "book" liu ouvinte sira.

Datuluk, ai-kanoik estimula kuriozidade no enkoraja atu buka. Iha ninia simplisidade, nia sai métodu pedagójiku loos ida, ne'ebé lori ema sira atu hanoin mesak, reflète, atu sukat pró no kontra sira, atu foti konkluzaun sira, atu interioriza solusaun sira no integra sira iha moris rasik. Linguajen subversiva ida: hanorin povu atu hanoin, sai krítiku, atu deskobre lialoos iha-ne'ebé. No ida-ne'e inkomoda tebes defensór sira mundu tuan nian no orden ne'ebé estabelese ona.

Tan vantajen sira-ne'e, Jezús labele la uza linguajen ai-kanoik nian iha anúnsiu "Maromak nia Reinu" nian.

MENSAJEN

Ai-kanoik dahuluk (vers. 26-29) mak fini ne'ebé moris no buras mesak. Ai-kanoik refere agrikultór nia intervensaun iha de'it momentu kari fini no iha momentu ku'u fini ne'ebé fó fuan. Nia la ko'alia kona-ba agrikultór nia asaun seluk: fila rai, rega fini, fokit du'ut ne'ebé impede buras... Kestaun esensiál la'ós buat ne'ebé agrikultór halo, maibé dinamizmu vitál fini nian. Rezultadu finál la depende ba ema nia esforsu eh abilidade sira, maibé fini nia dinamizmu. Ho forma ne'e, narradór hanorin katak Maromak nia Reinu (fini) mak inisiativa divina: Maromak mak atua iha silénsiu kalan nian, iha tarutu loron nian eh iha turbulénsia istória nian atu Reinu bele akontese; la iha buat ida hanetik nia planu. Provavelmente, ai-kanoik ne'e dirije ba postura hotu ne'ebé obriga atu Reinu mai lalais –zelota sira ne'ebé hakarak instaura Reinu ho violénsia kilat nian, farizeu sira ho obediénsia ba dixiplina legál, apokalíptiku sira hodi halo kálkulu kona-ba data Reinu mosu mai. Maromak mak dirije istória no Nia mak halo atu Reinu mosu, tuir nia tempu no projetu . Nune'e, ai-kanoik konvida ema ba serenidade no konfiansa iha Maromak ne'ebé la toba no la para atu realiza nia planu ba mundu tuir nia lójika.

Ai-kanoik daruak (vers. 30-32) mak mostarda musan. Narradór hakarak hatudu kontraste entre musan ki'ik oan ne'e no ai-hun nia boot (aas metru 2-4). Komparasaun ne'e atu hateten katak fini Reinu nian Jezús kari haree hanesan realidade ki'ik no insignifikante, maibé sei atinje sikun hotu mundu nian, hodi hola isin iha ema ida-idak, povu ida-idak, sosiedade ida-idak, kultura ida-idak. Fini ne'e iha forsa no dinamizmu Maromak nian, no Maromak uza buat ne'ebé mundu hanoin ki'ik atu konkretiza nia projetu salvasaun nian.

Ai-kanoik mak konvite ida ba esperansa, ba konfiansa no pasiénsia. Iha faktu simples sira, normál loron ba loron nian, iha meu folin-laek ida, haksumik Maromak nia dinamizmu ne'ebé atua iha istória no ofereba ba ema sira dalan salvasaun no moris nakonu nian.